



Grupo 7 di Formacion Social

A cuminsa dialuna mainta tempran cu 18 hoben

Un iniciativa di Gabinete Mike Eman cu ta demostrando di tin balor adicional hopi grandi nos comunidad

DIALUNA pa 7'or di mainta un grupo nobo di hoben a drenta programa Formacion Social na Marinierskazerne. E grupo ta inicia asina e programa cu a wordo introduci door di Gabinete Mike Eman I na 2011 den cooperacion cu varios instancia local y di Reino. E meta ta pa duna e hobennan un di dos oportunidad pa bira ciudadanonan ehemplar canando un caminda stret y productivo. Dialuna mainta cu nan tas riba lomba, e 18 hobennan a wordo ricibi door di Sargento Dijkhoff y Teniente Lorenzo Texeira na porta di Marinierskazerne. Sargento Eric Dijkhoff, instructor principal, ta encarga cu tur loke e hobennan ta bay haci durante cu nan ta den Marinierskazerne.

E ta haya ayudo di 5 otro oficial. "Awo cu nan a yega nos ta repasa e lista pa controla kendenan ta esnan cu a presenta despues di a wordo selecciona. E proceso ta sigui paden unda cu nan ta wordo controla pa mira si nan no a bini cu cosnan ilegal. Despues nan tin di lanta e tentnan den cual nan ta bay drumi e tres simannan aki," e militar a splica.

E hobennan aki di Grupo #7 di Formacion Social, ta keda tres siman interna sin contacto cu famia of amigonan y den e periodo aki nan ta pasa den diferente sesion di entrenamiento, sobrevivencia den mondi, ehercicio na lama, etc. Cu esaki e trayecto ta incentiva cooperacion entre e hobennan, respet, responsabilidad y otro habilidadnan social. Despues di e fase aki, e hobennan ta haya lesnan den cooperacion cu Enseñansa pa Empleo riba diferente ramo y experticio.

Den e grupo cu a cuminsa dialuna tabatin un par di hoben cu a yega di participa caba pero a cay na caminda, principalmente pasobra no por a wanta e prome tres simannan. Sinembargo a dicidi di purba atrobe, pero e biaha aki yen di conviccion di finalisa e 8 lunanan completo cu e programa ta encera. "Den proceso di bida hopi cos a bay robey,"

Amiel Gibbs a expresa e mainta aki. "Mi a purba aña pasa caba pero e tabata un tiki duro. Pero awor mi kier un cambio den mi bida. Mi kier mostra e hendenan cu esaki ta un otro Amiel Gibbs." Esaki no ta prome biaha cu Amiel ta participando den e programa di Formacion Social, pero e biaha aki si e ta convenci di lo yega te final. "Mi ta fisicamente y mentalmente prepara. Biaha pasa ta otronan a forsami bay, pero e biaha aki, ta ami mes a tuma e decision a drenta Formacion Social y mi ta cla p'e." Na final e kier logra cu e programa aki di Gabinete Mike Eman I y II por haci'e un homber honesto y cu e por logra haya un trabou, cu e sociedad mir'e cu otro wowo y cu e por biba un miho bida. "Amiel Gibbs mester di hopi disciplina y no tin miho luga pa haya disciplina cu aki."

Jamil Geerman a dicidi di purba pa mira con e programa aki por yud'e. El a tende di dje via su ruman homber, kende a trata un biaha caba y no a logra. El a dicidi pa compaña su ruman, kende a inscribi su mes un biaha mas. E hoben aki di 18 aña ta haya cu e programa aki ta algo bon cu por yuda nan drecha nan bida. "Pa mi keda slons riba caya, ta miho mi bin aki den y haci algo pa bida," el a duna di conoce. E tin e speranza cu na final e por haya un trabou.

E mesun pensamiento aki ta wordo comparti door di Randy Larmonie (18), kende a drenta e programa despues di a keda 3 aña na cas sin haci nada. "Mi a tende di e programa aki tur caminda rond y despues mi mayornan a bisami cu kisas esaki lo ta algo pami. Mi a yega na un punto cu mi mester haci algo. Mi futuro ta depende di loke mi ta haci awo. Si mi kier algo lo mi logr'e y lo finalisa esaki tambe," el a termina bisando.

Gabinete Mike Eman II e aña'ki a pone e programa riba presupuesto di pais Aruba mes debi na su exito y ta haya cooperacion di Marinierskazerne pa e parti di instruccion den disciplina.

